

柯家山館遺詩

鼃之鳴至濁矣或者曰此鼓也蚓之鳴至微矣或者曰此笛也僕之五七字至無節奏矣而或者曰此詩也天下不虞之譽故多出於意外而人之嗜好品評往往有如此者僕未冠時喜學爲古文詞又好言六書詁訓之學其於詩未暇兼營也偶有所作旋即燬棄朋儕中不乏能詩之士未嘗敢與之應酬但和僕雖不才蓋深知恥也丙寅以還境遇日困中心鬱紆無所控告感事述懷輒以詩發之如病夫之呻吟如被撻者之呼譽此豈有意媚人之耳目者然閒出以示人亦或以爲可喜里有女奇醜撫鏡自照知其醜之弗可以飾也屏粉黛絕

華炫椎髻布衣謝媒而勿嫁此僕之詩品也客之好僕  
詩者果何所見邪往者嘗以詩質之內兄許周生請其  
政定久之弗應彊之則曰君詩無可毀亦無可譽不能  
有所言也若周生真深知僕詩者嘉慶戊辰夏五月元  
照自序

詩也者所以自道其性情也情之有悲愉緣于境之有  
逆順境之逆者處之難境之始順而繼逆者處之爲尤  
難矣悔莽居士好古力學自其弱冠時已有聞於當世  
相知者咸以金闈玉堂相期待顧於世之榮利漠然置  
之年未壯抱風木之痛甫免器而骨肉滋毀不能安其

故居舍而之吾邑卜居於城北柯家山之麓垂六年矣  
人情弃菀集枯鮮不鬱邑侘傺而爲不平之鳴者居士  
則曰有山水以悅吾性有載籍以資吾學有良友朋以  
廣吾聞見我之所得者已不薄矣吾更何歉乎故所作  
詩不皮附前賢而忘其身世不信筆酬應而汨其性靈  
和雅清婉遠紹風人之旨開化戴荆部謂其品在永叔  
介甫之間也今茲居士取己巳以後古今體詩如千首  
彙錄一冊畀球讀之命爲之序球之弁淺何足以知居  
士詩然念從居士游有年辱居士知愛不敢不有所言  
居士尚有以教之辛未秋九月德清後學徐球序

辛未之秋悔菴居士屬球序其詩越一年而居士病病  
五年而竟不起孔文舉所謂憂能傷人不待永年者與  
今其身後之事交游所不能爲謀者固無可如何至於  
平生簞箬弗使湮沒九原有知不能無望于友朋也邑  
侯順德何藜閣先生屬球校錄其自定詩藁六卷規付  
削刀更識數言於舊序後竊謂居士之學不盡於詩見  
居士之詩亦不盡此六卷其所芟存有深意焉後之覽  
斯集者亦足以見其學之有成而悲其過之窮已丁丑  
九月球又書

柯家山館遺詩目錄

卷一

丙寅丁卯計八十首

卷二

戊辰計八十七首

卷三

己巳庚午計八十五首

卷四

辛未壬申計一百四十四首

卷五

癸酉甲戌乙亥計一百廿九首

卷六

丙子丁丑計一百廿五首

柯家山館遺詩卷一

歸安嚴元照修能

金匱楊戶部

芳嶽

自京師寄示所作香修曲賦

謝

以下兩寅

雪花蔽空舞窗下朔風吼寒梅報臘盡窮愁互相守佳  
人眇天末悵望空搔首詒我百琲珠延佇半年久不分  
小除夕郵筒落吾手長篇香修曲清絕無點垢娟娟雪  
中月澹澹春前柳風調比前輩定出梅村右擊節曼聲  
歌歌罷更呼酒京華三千里魚雁不時有握手空復情  
此生知得否感此心悵悵因之呼負負君詩廿年前已



見棗梨壽子雲生並世佳句傳萬口大名在文苑較勝  
印懸肘茫茫閱人世如君洵寡耦升沈一朝事豈足定  
妍醜襟懷應曠蕩放眼千載後何庸嘲菜把鬱鬱歎衰  
朽寄君詩一篇離悰細分割藏拙附片言煩君爲覆瓿

送家上舍

章傑

之安徽

紅橋畫舸春江潯垂楊垂柳煙雨深驪駒歌殘客欲別  
紛然淚下沾衣襟送君千里江南道只有萋萋原上草  
對鏡朝來自髮生始信銷魂人易老與君少小結相好  
荏苒流光又幾時屈指交游多不俗推君第一斷何疑  
痛念先人暮年病瀕危豫託癡兒命孤露恩恩歲七更

蕭牆是處生機阱外侮紛芸雜內虹艱危反側仗莽蠶  
西窗翦燭宵來雨話舊依稀似夢中餓來抵死催人去  
爲我行行復猶與風雨飄搖又隔年更欲留君那能住  
君到蕪城正暮春故山回首總傷神秋風莫負明年約  
碧浪湖邊好結鄰

題何三元鈞蒙泉高寄畫卷

高樓對孤山春雨洗濃翠祇今葛林園是古招賢寺吾  
友昔遠歸於焉此身寄湖山作清供琴書絕塵累便應  
長閉門消搖謝人事何必求長生神仙已不翅移家眞  
大錯入城近塵肆須眉染俗狀米鹽飽世味偶然落湖

舫閒鷗笑顛頰唯餘尺幅畫依稀見高致十年負此圖  
撫卷應自媿晴窗重摩挲殷勤乞題識莊言吾未暇下  
筆且游戲

章傑

約過里門不至以詩督之

沈沈春夜永一燈耿如豆懷人不成夢側耳聽殘漏中  
宵披衣坐顧影驚老瘦淋浪一夜雨谿橋添曉溜片帆  
出城南半日可相覲閉門如茹毒耳目苦眩瞽藉君劇  
談力起廢勝鍼灸逾約有責言先以尺書授遲遲過寒  
食相見定遭詢

重送

章傑

欲開未開花滿枝欲垂未垂楊柳絲當筵酌君一杯酒  
問君行計何遲遲隄邊夜來水拍滿水漢搖搖出水短  
鷗鷺笑人真太癡錦江孤負春波暖春波春草同一碧  
腸斷江南遠行客畱君不得送君行莫笑今宵酒腸窄

陪章傑

道場山展曹州公墓歸舟賦此重以贈

行

春山如美人相對易斷腸登臨況送別惻惻增慨慷吾  
鄉山水窟勝絕推道場君家有佳城鬱鬱松檜蒼作客  
游江南及此春草芳再拜辭墓門涕淚紛霑裳我生亦  
孤露百端集茫茫回頭見白塔半尖插崇岡招要凌絕

頂聯袂相扶將密林漏日影灑面松風涼煮茗滌煩襟  
小坐開竹房暮色上人衣轉覺歸路長細徑石犖确兩  
腳疲欲僵言尋太初墓小憩挂瓢堂片月懸高柳入城  
已昏黃茲遊信奇快到家樂未央對酒忽三歎爲君趣  
行裝畱君更何計送君殊仿徨相見訂明年同賞荷菱  
香慎勿走燕薊歸期杳難量谿山佳如此故鄉勝他鄉  
他鄉有何好歷磔輪蹄忙從今關河隔魂夢勞飛揚止  
止勿復道多言徒神傷

重送

章傑

汝已飄蓬慣家居總暫時關山千里隔宗祀一身支揚

柳絲絲裏煙波渺渺隨離亭回首處心事幾人知

借章傑 往無錫初發口占

相思判隔路三千爲我行期展一年卻放輕舸何許去  
雲腴欲試惠山泉

積雨初收未放晴谿橋新漲半篙平篷窗滿眼青山好  
不許長年挂席行

先至德清訪蔡明經表兄

景光

斷岸檣輕橈一逕問修竹日斜人未歸市地樹陰綠

晚步慈相寺

暝色四山合叢薄炊煙生講院半里遙微聞吼華鯨看

山愜幽興幽磻隨人行草樹亦芬馥鼻觀難具名高躡  
緬南澗懷古生遐情坡仙遺墨在試以眞僞評惜無小  
龍園負此山泉清明朝挂帆去吾意重怍怍

過舍山

清晨泊新市日午過舍山煙波湛明鏡窈窕臨嬌鬟亭  
亭孤塔影中流臥微瀾登眺豈不快芒屨惜我孱先人  
昔攜我春遊曾躋攀忽忽廿五年屐齒蒼苔斑山椒滄  
曉閣竹樹空檀欒陳迹君勿問茲游已寡歡

過太湖

東南風起帆初飽一葉斜飛疾於鳥吳江城下棹不停

便逐漁榔落茫渺陂田菱葑千頃綠白鷺空來一點小  
連山展翠作屏幃遠塔如鉞出雲表湖面轉闊風轉勁  
對坐無言心悄悄五龍橋外催卸帆回首遙峯失青縹

游師子林

輟棹日亭午徑叩師子林平地出巖岫不覺意匠深老  
樹倚石罅半枯無清陰籥閒養病鶴翎鍛聲亦暗凭闌  
無紅袖簾影空沈沈當階開勺藥素豔愁人心古德注  
楞嚴遺迹不可尋情想較多少此理自古今

拙政園

幾折紅闌舊板橋數行楊柳女兒腰飛花不解隨春去



辛苦風前作雪飄

壺觴歌板昔人非  
高閣層樓帶夕暉  
此日我來誰是主  
山樵無復舊紅衣

泊虎邱

望望七里塘行行日欲昃  
到山遊客盡浮圖  
空岌嶷講臺高欲傾  
盤石淨如拭  
相對且箕踞  
坐待樹陰黑  
劔池水沈沈  
疑有神怪匿  
慘淡真孃墓  
穹碑誰爲植  
英雄規霸圖  
美人豔傾國  
遺跡委蒿萊  
埋沒到古德  
回船催買酒  
慰我淚霑臆  
城門柝聲急  
閉篷且掩息

愛山不肯捨  
維舟山寺門  
勝遊情旣愜  
夜夢清不煩  
凌

晨攝衣去茂林鳥未喧虛閣俯平蕪高敞延朝瞰天然  
大畫幃暖翠手可捫有酒不能飲孤負山容溫仄徑尋  
鶴澗指點古城垣興亡事何限終古山無言笑彼傷心  
人憑弔空斷魂

隆禪師塔

曹溪一滴燈分五臨濟門庭盛如雨南渡法席首徑山  
氣宇如王誰敢侮同門大德推隆公獨作此山盥睡虎  
兒孫龍象滿天下易代公然稱鼻祖妙喜瓣香久斷絕  
此老薪傳竟千古兩行古柏尚蔥蒨至今遺蛻藏山塢  
眞儀丹青半剝落緇衲何人拜偃僂素壁題名誌歲月

誰識西吳兩僧父

登龍山頭茅峰

九龍蜿蜒岡巒拱日日峯頭白雲擁陵風直上二千尺  
袂衣輕快芒屨重高山當前如大敵步健端憑一鼓勇  
勁風橫吹人欲墮目眩驚看翠微動野僧開關喜客至  
苦薺盈甌手親捧危關一俛詫奇絕腳底浮圖勢欲涌  
江湖浩蕩落吾手渺渺煙雲接頰洞此閒合作終老計  
輕別禪關心愧悚他年重到訪石門準擬茅菴結龍提

寄暢園

江南花事減芳菲春盡園林載酒稀  
驀地殘香撩客恨

水邊零亂野薔薇

青山無語水無塵  
底樣安排寄此身  
輪與園丁清福穩  
朝朝臨鏡看眉顰

歸舟

孤負危橋燕語留  
汀花汀草送歸舟  
津亭楊柳垂垂暗  
只與行人乞暮愁

德清往返口號

作客江南半月程  
卸裝又趁片帆輕  
斜風細雨孤篷底  
一路看山到德清

生涯合付水雲鄉  
鳧雨鷗煙細較量  
百尺樓頭湖海氣

消磨多半爲紅妝

爲沈秀才哇題其尊甫二丈小影

蓮塲山下前科村中有一人孤鶴鶴白須紅頰長軒軒  
不肯低頭就籠樊一生力溶衣食源神仙富貴何足論  
煙霞泉石匪思存瓜茄豆麥雞鶩豚屑屑料檢羞素澹  
有子讀書清且敦我今訪故來叩門丈人對客顏色溫  
呼酒自酌傾瓦盆半酣笑語齷齪反公等碌碌度朝昏  
一旦詔下舉力田合讓老夫作狀元回頭畫幃懸粉垣  
酒闌磨墨乞一言欣然下筆波濤翻詩成白晒詞太繁

寄章傑

種得芭蕉幾許長  
小闌干外伴新篁  
無邊生意眼前足  
還有一階秋海棠

檢點空囊可奈何  
庭前桂樹日婆娑  
收他一斛黃金屑  
買米何須要許多

方牀六尺儘寬舒  
及此秋風七月初  
銷暑莫如支枕好  
讀書已錯況鈔書

聞道吳門重作客  
舊游根觸有新詩  
問君斟酌橋邊過  
柳色何如三月時

判袂河干又隔旬  
夜航珍重寄牋頻  
幾番見說摘船到  
畢竟此言真未真

詠懷十首

塊坐寂無事，薄暮開柴扉。瓜蔓被徑路，桑柘自相圍。夕陽忽西下，慘淡流光微。蒼莽發浩歌，所嘅知者希。青山曾有約，避地寧可非。逝將舍此去，煙霞相因依。桑梓豈不戀，哲人貴知幾。

我生未強仕，胸懷百感積。朝來梳短髮，忽已數莖白。年華去如駛，卅載盡虛擲。立身已蹉跎，攬鏡空自惜。富貴豈足論，謀生尚無策。憂貧不憂道，諒爲名教辱。姓氏傳人閒，浮名定何益。

周晔識方名，再周解把管。淋漓擘窠字，元章鬼在掬。賜

冠愛交結得與耆宿伴說經研故訓舊聞力排纂詩文  
無師承下筆恣杜撰知好多嗜痴激揚半虛誕浮譽造  
物忌終歲憂寤寤食報理宜爾受爵敢憤懣及今早自  
悔庶救桑榆晚丁寧期努力補過不暇嬾

吉人之詞寡仁者其言詗尼父宣此義反復著明訓生  
成窮薄相出語工譎斬廣坐恣談諧觸機不忍僞澆矜  
非長者利口聖所擯逞爾俄頃快積讐集悔吝因循不  
卷舌行作道中殫

夜來風雨集窗外疏竹響晨興鳥聲樂高林初日上陽  
精剝陰翳鴻蒙開氣象滋液猶未晞輝光到草莽羈愁



苦相守對此胸懷爽義和不停馭千載一俯仰儻忽曷  
影移念念成疇曩遷謝無如何曷爲多嘔慷乘時終有  
日慎勿厭塵坱

德慧存疢疾燕安乃酖毒閱歷思微言至味勝梁肉薄  
田兩三頃生理未嫌蹙著書長閉戶俯仰心已足未能  
致顯榮庶幾免刑戮蚩蚩半生過忽忽憂患續吾道雖  
艱難人事或翻覆勿以窮途苦遂效步兵哭塞翁之馬  
失事後始知福

生子不可教有如耕石田縱然穠蕪勤百歲無豐年家  
世服儒冠於茲十四傳式微等齊民門戶日以籌檣柱

竟無策望子心彌虔阿琮眞豚犬景升端可憐世業將  
墜地中夜耿不眠稚子才兩歲學語猶未全譬彼百鈞  
重藉此一綫懸成立未可必違論懋與賢裕後豈無術  
吾聞種德先

飽食但息偃虛負白日長靜極思散步響屨循空廊阡  
陌絕無人誰歟共翱翔憶昔杜陵老巴蜀營草堂東坡  
遭遷謫萬里投南荒嗟我與二公風味相頽頽鬱鬱久  
居此何異幽室藏去之適樂土無若吳羌良山川各異  
縣風俗非他鄉買山資幾何吾將一葦杭

矯首片雲白眇然懷故人故人如白雲可望不可親

昔夢恍忽如睹瓊枝新別離豈得已合并會有因偕隱  
老巖壑此志終當申願言矢金石毋爲徒酸辛

璞玉錮沙石中有殊采存淤泥生蓮花香潔品自尊窮  
冬沍霜雪轉眼春陽溫久雨積陰暄若木升朝曦物理  
每遷變人事多屈伸偶然鍛毛羽他日終飛鸞放逸  
自弄徒負造物恩

無錫王秀才

芝林

書來徵賦江陰黃烈婦詩

事在

丙寅四月

入夜

人傳到尺素書新詩清絕如芙蓉

江陰女兒身姓朱深

黃郎巖偶綺閣虛求凰不惜雙明珠年華灼灼桃李敷  
于歸正及芳春初新人故人定何如鼓琴鼓瑟兩意孚  
相期鸚鵡百歲俱人生夢幻真須臾黃郎忽隨朝露徂  
枝柯糾結青珊瑚一朝斷折難改圖麻衣血漬淚眼枯  
獨生不若死可娛家臨一帶瑣塘渠渠水清泚浴鷺鳧  
志決委此千金軀腰細不勝衣五銖能以隻手綱常扶  
流傳贊歎無賢愚詠歌遠播徵到吾大節皦皦不可誣  
作詩永爲閨閣模

爲人題空山聽雨圖

一角茅菴何處是莽蒼千山萬山裏瀟瀟夜雨松竹喧

道人之心如止水晏坐圓蒲淨法塵朝來鍾鼓轉清新  
笑他白髮僧廬下還是悲歡離合人

孤山蘇公祠觀荷同丁提舉

如琦

昔年消夏蘇祠住湖畔荷花最多處紅幢翠蓋紛相迎  
水佩風裳不知數亭亭映水自玉立冉冉淩波試微步  
品格宜標君子真顏色空勞美人妒明珠亂落急雨飛  
紅衣半卸輕颺度直教身世變清涼占斷人間好風景  
勝遊重續不易得清福須憑天所付故人憐我工愁病  
一舸攜來慰心素嫣然應笑舊時人顛顛容華已非故  
臨水軒窗一帶閒暖暖疏簾日將暮此別重來又幾時

倚遍闌干不能去

寄朱秀才琳

虛堂臨水濱戶牖生涼風門前有嘉蔭蟬嘒曳遠空秋色日以絢滿階鴈來紅念彼堂中人獨立心忡忡槎牙生肝肺鬢髮成霜蓬毋乃意氣盛受此愁病攻唯我許同志志同遇亦同君若魚在罔我如雉羅置不如讀農書且作田舍翁吳羌山色好吾將老其中但慮德不修勿悲道欲窮勉矣各努力歲月殊愍愍

卜居德清北城外柯家山麓與郎秀才薪之結

鄰賦贈五絕句

悄悄水竹自清幽  
檻外青山似佛頭  
清福只君修  
得到不須惆悵不封侯

低頭不屑老彫蟲  
自把長鑱種晚菘  
寄語等閒休見客  
怕人錯認是英雄

草草誅茆結比鄰  
白雲應笑往來頻  
入門禮數都忘卻  
莫怪匆匆人錯主賓

閉關塵事不相妨  
怪道朝來有底忙  
說與世人渾不省  
無邊風月要平章

倚水桃花發滿枝  
臨風弱柳一絲絲  
君家景色春來別  
遲我明年更賦詩

濂比似海棠西蜀產空見慣柰緣輕  
裁雲散水句誰  
成乍心傾替腸縈轉悔年時著眼未分明紅豆拋殘人  
去後詩卷裏敘平生

湖山秋色尚盈盈旅鴻征候蛩鳴四角中心碁局總難  
平子野間歌從宛轉綠庭恨訴秦箏且呼歡伯課經  
程坐長更剪孤檠一任落花流水各縱橫畱待曉風殘  
月路重與弔柳耆卿

點絳脣

送別梁甫

清漏無聲一燈窗外瀟瀟雨夜闌聽去點滴離人語



其惜飄零怕作消魂句江南路幾聲柔櫓煙樹無重數

又

戊辰備書會城之時寒宵無事與戴金谿李  
西齋倪米樓作茗肆之集僕命茗肆曰畱鴻  
館續圖賦詩以誌其事歲暮始散去次年長  
夏扞杭與西齋夜過館中試茗藉聞金谿江  
北寄馨之語時米樓正作姑蘇之游感愴之  
餘爲賦此解又憶客冬同人集於城北天后  
宮爲秋鴻館之會米樓欲於姑蘇啟春燕樓  
招僕往集故詞中及之

燈火闌珊幾多春恨留鴻館爲誰腸斷零落寒宵伴

消息傳來天際逢歸鴈飄零慣小樓春燕忘了西湖畔

和作

仁和倪稻孫米樓

幾日吳門何曾忘了寒宵侶那時梅雨對茗懷人苦

記否逢君却在孤山路勾留處別無鷗鷺腸斷鱸過句

菩薩蠻

長至前二日得米樓仲秋所寄詞札南樓令

一解試茗見懷之作點絳脣二解一以和僕

一以寄曲中人香雲卽春燕主人也因賦此

寄之約與臘月十九日同祭坡公也

亭亭千尺霜林月懷人幾度成圓缺谿水碧於苔錦鱗  
遲上來彩雲香不遠惆悵何曾見準擬慰相思歲寒

風雪時

坡詞在歲  
寒巖畔

臨江仙

寄米樓書久而未發更闌無俚更賦此解以  
寄兼致金谿西齋

奕硯寒窗裁尺素連朝開了還封畫圖歷歷數游蹤簾  
波侵茗綠燈暈襯妝紅孤館春淡聽夜雨關心鴻影  
怱怱天涯腸斷幾人同雲龍分上下風絮各西東

采桑子

暢好雲林昨夜游家書珍重促歸舟今宵翦燭西窗下  
只訴湖邊一段愁

八月初到西湖作

又鼓西泠棹重經水磨頭煙波留晚霽天地正清秋葛  
嶺新開路孤山舊酒樓何人憐熟客沙岸有閒鷗

觀蘇公表忠觀碑宋刻殘石

表忠觀碑八百字玉質金相極典貴文爭雲月日星光  
筆挾天風海濤氣七百年來半淪沒翠墨精靈神所闕  
劫來宇下撫殘石作作寒芒八雙背平生意氣頗自詡  
到此爽然空愕眙卻立凝神重諦審妙以沈雄出姿媚

知公本是謫仙人面目太與僊父異誠懸北海豈不健  
劔拔弩張乏風味公之忠義如平原下筆居然神與比  
我願椎拓藏家塾日日焚香頭叩地覆刻模傳出誰手  
優孟衣冠殊可媿

謁于忠肅公祠拜瞻畫像

黯黯微綃挂素壁空堂白日飛霹靂豐頤廣頰貌何人  
君認取臨安伯緋袍慘淡雙袖窄少保腰牌畱字迹  
森然脣宇出威稜下拜何人不動魄怪底當時畫者誰  
對面能傳英武格祠墓長教過客悲粉墨猶爲鬼神惜  
祇恐絹力不支久更閱百年終弃擲鄂王遺像勒精忠

公貌亦應鑱樂石  
英姿同作湖山鎮  
永與邦人驅癘疫  
雄文誰記王鐵槍  
世上歐公定難覓

集慶寺拜宋理宗畫像

何人能繪日月容  
穆陵遺像勾模工  
真龍神采動心魄  
意象不與蛟螭同  
卅年半壁小元祐  
南樓煙月歡娛空  
乘雲上升一轉眼  
頭顱何意遭焚崇  
區區縑素誰護惜  
劫火不到空王宮  
青豆房開一展拜  
黃袍尚有光熊熊  
山南冬青已無樹  
野棠花對斜陽紅  
誰其麥飯作寒食  
此閒畱得闍黎鐘  
香花永與修供養  
丁寧莫遺塵埃封

八月二十日華三丈寓館夜話邀武康徐孝廉

熊飛

飲酒看月賦此

殘月如幽人夜深始出山相見積雨後如病新起屢遲  
遲吐華彩漸上庭樹端空齋話永夕短燭光未殘開門  
看西湖湖水靜不瀾隔院寓徐陵酣夢松竹閒叩關呼  
起起揩眼癡語調何處無明月湖邊更清寒何夜無明  
月良朋盍簪難急解杖頭錢買酒供清歡笑語驚沙禽  
雙飛過前灘漁火耿一星橋外煙水寬勞生苦碌碌媿  
此錢笠閒杯行莫厭多難得紅上顏歡悰不可竭良夜  
漸亦闌酒罷惜分手風露空珊瑚坡翁在天上思之杳  
難攀後人亦思我茲遊永不刊

湖樓坐雨

西湖三面山面面芙蓉髻連朝雨冥濛情如妝閣閉湖  
中雨亦奇開窗快危睇愁顰亦傾城啼妝轉絕世湖山  
娛心神豈必待開霽笑彼尋芳客對此空侘傺吾欲喚  
漁艇一棹入煙際

舟行口占

菱角香濃豆莢肥白蕢紅蓼正芳菲何人畫幅江鄉景  
著我扁舟一棹歸

蔡孝廉

登津

之母徐孺人曾割臂以療翁疾孝

廉繪圖徵詩謹系長句



疏篁滴露聲。瓊玲沈沈深夜香。滿庭金刀按臂快一割。  
片鱗可以延千齡。妙手傳神留水墨。令我披圖增象息。  
盱衡今古豈無人。到此如何媿巾幘。

擬古

北風中夜急。徹曉號空林。朝來有所思。淚下霑衣衿。憐  
彼蕙蘭質。受茲霜雪侵。采葛復采蕭。兩地同此心。此一解此

心非明月。明月有圓缺。此心非金石。金石可磨滅。容華  
有日盡。明誓何時畢。念昔共酸辛。思之心欲折。二解腸如

車轉輪口如闕。銜碑四顧無知己。有言將訴誰。踟躕步  
中庭。孤鴈聲正悲。晚歲已暮。汝今將安歸。三解歸來空

堂上何以慰愁思，旨酒且獨酌。未飲心已醉，但可變顏  
紅。那能解宿翠，悲歡信有時。杜康豈足恃，四解旨酒不成。  
飲素琴聊復彈，一彈再三歎。音響何淒酸，念彼遠方人。  
零淚正萼蘭，何以慰其心。丹青永不刊，五解

古詩五首

朔風生庭隅，明月入帷幙。錦衾空自爛，中夜慘不樂。起  
坐三歎息，愁思將焉託。伊人天一方，何以慰寂寞。  
相思不相見，相見不相思。相見如月盈，相思如月虧。盈  
虧迭爲代，安怪相見希。但得同心人，勿悲長別離。

登山陟羊腸，吁嗟何艱難。叢莽歎山鬼，當路多羶穢。道

涂阻且長車輪爲之剋燕居會有日對此勿永歎  
幽蘭生空谷孤芳雜荒穢獨秉君子性不言深自愛采  
采復采采紉之以爲佩凡卉品自殊服媚不爲態  
中庭桃李敷枝葉生輝光春風一以厲委弃道路旁容  
色結歡娛安得百歲長南山有松柏歲宴終不傷

擬燕歌行

北風冽冽吹我衣嚴霜惻惻砭我肌空房蟋蟀鳴階墀  
懷人不覺淚霑扉問君遠遊胡不歸歲云暮矣將安依  
空倉之雀常苦飢欲寄尺書無鴈飛錦衾角枕夜何其  
空牀獨處長歔歎辛苦爲君不敢辭願君相諒莫相疑

此身可化心不移  
它年相見會有時  
洞房清歌絲竹悲  
悄悄良夜簾箔垂  
旨酒滿泛流離卮  
與君重訴長相思  
里門夜發入城舟中作

寒夜無月明  
衆星粲以列  
嚴霜被野岸  
孤舟中夜發  
殘燈燄欲冰  
布被冷於鐵  
展側不成寐  
柔櫓自鷓鴣  
軋勞生多苦辛  
方寸忽如結  
飛蓬在風中  
漂轉何時畢  
骨肉豈無情  
奈何若秦越  
淒涼念山居  
山氣憊肌骨  
婉變山中人  
何以禦凜冽

臘月十九日同人祭蘇公祠

風緊雲繁天欲雪  
扁舟昨夜塘西發  
籃輿一徑到西湖

怡值坡仙降神日霜竹迎風蘼可卷凍鄂待春香未泄  
山容黯淡湖影寒對此風光客愁絕我家去此百里程  
殘臘浪游寧可必乍逢嘉會事豈偶得展瓣香心所切  
匆匆分手日已暮老友殷勤重惜別相期春發還復來

白傅生朝遲一月

項秋子訂來年正月二十日同祭白公祠

柯家山館遺詩卷二

歸安嚴元照修能

感事述懷 以下戊辰

顛悴空牀半枕雲輕稠孤負妙香熏朝來重把菱花照  
消滅紅潮又幾分

傷心鬢影日蓬鬆鏤月裁雲往事空身似經霜病秋葉  
也曾禁受打頭風

涅玉焚蘭意未平十州聚鐵事分明秋風打槩江南道  
錯字當年早鑄成

淒涼永巷較何如弱質判同木石居供養深閨無長物

一簾山翠半牀書

屈指風波幾度經  
水天閒話太零星  
笑他骨相生來別  
久已身形似鶴形

飛絮飛花不自由  
蕭郎身世似黔婁  
曾聞私祝蓮臺下  
願共清貧到白頭

連天風雪滿雕欄  
欲放微陽一綫難  
說與梅花莫惆悵  
春前須耐十分寒

修竹森森翠尾長  
清陰深護讀書堂  
不知上番經春雨  
幾日新梢透過牆

題何三元錫訪書圖

借書直似借我頭還書何異還荊州好書奇癖已入骨  
箴砭合與倉公謀家藏萬卷意未饜蠟車障壁勞爬搜  
零星只合供一炬重之不亞琳琅璆黃金八手不隔夜  
一一輸向估人舟眼前寒餓何足計窮人怪笑妻孥愁  
忽聞人家有清祕輕帆順逐春江流叩門相見不暇掛  
請君祕笈觀其尤摩娑嗟賞五內熱紅光潑潑紫雙眸  
俗以羨他所  
有曰眼紅吟詩試效蕭翼賺據舷欲作元章求叢殘  
捆載累行李推篷細以丹鉛雋到家笑口吐不嚼蹄蕨  
新獲珊瑚鉤誰歟妙手工績事冥模意匠窮瑯鏤明燈  
披卷三歎息嗜好我亦酸鹹伴奇書瞥眼不肯捨往往



斥典千金裘神麝一角魏儀禮

魏文靖公了翁儀禮要義五十卷

柴窯

半器張春秋

張文憲公洽春秋集傳世無其書子曾購得元延祐甲寅刻本殘帙廿七卷係倦圃

藏遺經在笥鬼神護草堂夜有虹光浮醫方小說亦入

錄

宋刻史載之方二卷紙墨極精古朱佐集驗醫方十卷咸淳開刻本有高瑞南周雪客諸印記皆世所

絕無者夷堅志甲乙丙丁四集八十卷長洲文氏所藏未刻本有玉蘭堂辛夷館諸印又有季振宜印記今皆

售於人

百城可以輕王侯年來風味類杜老一錢不爲空

囊留買書豈若賣書好他生未卜今生休偶然見獵一

心喜多生習氣除無由春來有約須告我與君同作江

南遊

將往山居留別里門友人

絲絲拂面柳條柔，獨上溪邊舴艋舟。又與故人成小別，一聲款乃幾回頭。

莫道歸期未有期，故園桑柘繫人思。吳蠶看到山頭白，是我輕帆欲挂時。

南屏九曜峯下謁蒼水先生墓，昔年曾與海寧錢三處士覆過此。今處士下世已十三年矣。

張公埋骨處，慘淡傷眉鬢。如此好山色，清波門外看。孤忠廿年盡，淺草一坏寒。淒斷峯前路，斜陽笛又殘。

萬峯山房贈一上人

積雨初罷山翠濃，慧日峯下支短筇。縈紆石徑得精舍，

箕箒高下環玲瓏道人與俗殊嗜好萬斛冰雪藏胸中  
偶然凌紙風雨集往往不辨魚與龍堆盤日薦花豬肉  
佐以美酒蒲萄紅區區戒律縛不住了知罪福空花空  
可憐俗眼小如豆皮相乃以顛名公呼以牛馬馬牛應  
以顛自號欺凡庸謁來山舫識公面大聲醉語驚聒聾  
坐中尚有故人子爲渠傳說新詩工此意大可砭薄俗  
不以厚薄分窮通世人愛公愛詩酒我愛公有長者風  
是中歲月可忘世山前揮手何怱怱秋來爲我置一榻  
我欲來看秋山容

萬峯山房之旁有奇石拔起山根嵌空玲瓏特

爲詭異有刻字曰獨秀

椎鑿何年巧匠成  
摩挲題字尚分明  
江東此日非無我  
獨秀如何竟讓卿

宋孝廉

咸熙

置酒湖舫釀奠其尊  
甫助教感賦

生西湖死西湖  
杭州西湖天下無  
西湖生西湖死茗香

先生竟如此

先生於癸亥年  
歿於昭慶僧舍

先生天上謫仙人  
衣袍曾

浣東華塵朝衫一卸不復著  
歸來管領江南春  
江南只

愛西湖好辭家高臥湖之濱  
生涯一杖兩芒屨  
蹋破南

北雙峯雲浮漚  
此身寄蘭若有酒日醉醇  
乎醇騎鯨忽

返道山去一泓湖水空  
鱗鱗孝廉霜露情何極  
歲歲湖

中酌寒食當年我亦客西湖感舊蒼茫心惻惻鮮民之  
痛我更深對此能無淚沾臆

新雨初霽何三招集看經樓小飲乞書屏幃卽  
席賦

湖光淡欲活山容粲以舒有如絕代人妝鏡開徐徐陟  
彼湖畔樓及此新霽初同心暫相集把酒聊相於空翠  
落杯尊清輝染巾袂興酣催灑翰解襟右開胫旁觀勿  
咄咄筆陣新來疎閣筆復久坐柳陰轉階除人生不行  
樂百歲徒云虛鍾鼎較湖山孰爲熊與魚從吾意所適  
遂足傲几筵誰能受局促長曳侯門裾

鷓鴣天

辛未正月十一日夜子時立春

裊裊花幡綴鬢新  
佳人頭上巧迎春  
梅花雪裏無消息  
夜半東風與返魂  
冰泐泮石泉溫  
隔牆小鳥報芳辰  
勸農料理閒巾笠  
次第青山看白雲

又

元夕雪

桂子香濃凝不飄  
東風吹雪過元宵  
街頭人靜無燈看  
枕上愁多有夢撩  
銀燭暗玉笙調  
誰家歌板夜相邀  
綠窗坐對清於水  
墮砌仙雲一片嬌

高陽臺

三月十六日許表姪叔貞婚期是歲三月置  
閏十四日清明十六日墾僕於清明前歸里  
畱此贈之

筆嫵遙山鑪溫沈水佳期纔過清明雲豔風香最宜天  
氣新晴杏梁乳燕雙栖穩護淺寒垂下簾旌只難禁淡  
巷朝來斷續簫聲  神仙富貴尋常事算何如年少錦  
帳金屏春也長畱憑君細數階蓂當頭況有團圓月鼓  
昨宵還更分明恨谿邊無數垂楊催送歸程

柳梢青

宋人以此調賦桂子乃易之以賦梅云

閒倚疏寮問春何在春在梅梢  
藥欲飄風枝疑著雪淡  
到無聊清寒細雨連宵  
定愁溼雙鬟翠翹驛路三千  
闌干十二芳信迢迢

秋波嬌

消息羅浮夢但迷夢醒十年  
遲當初不合早梅花下種  
了相思而今怕到花時候  
心事幾人知春風詞筆儘  
判孤負玉骨冰肌

采桑子

斜陽庭院無人到誰倚房  
窠獨笑東風照水天桃一  
樹



紅黃昏不覺春光靜  
月澹花濃濼濼溶溶  
仿佛妝成  
曉鏡中

米樓云此數闕極爲明淨

踏莎行

雨裏衰桃風搖纖柳  
日長池館凭闌久  
珠簾不爲看花  
開悄悄  
情況是飛紅後  
幽夢疑雲別情如酒  
薄寒只怕欺羅裏  
欲憑雙燕寄相思  
遙山一夜和春瘦

漁家傲

簾幙遮愁遮不住  
畫梁棲燕般勤訴  
片片飛花隨水去  
知幾許  
可憐昨夜廉纖雨  
芳草黏天誰是主  
踏青怕

卻對秋風不憶家

同嘉興丁明經

子復

萬峯山房訪一上人飯於

山舫

茅菴隱修竹盡日翠煙封笠屐忽雙到腐蔬聊一供媚  
人紅葉晚留客白雲慵歸去重城遠愁聞隔院鐘

同開化戴刑部

敦元

宿仁和王上舍

樵

厲館

吾愛戴員外出山仍在山人如黃菊淡意與白雲孱  
翦燭劇談苦對牀清夢閒王郎有奇趣留客不嫌頑

同戴刑部王上舍游靈隱

北山靈隱寺重到已經年修竹翠無盡晚楓紅可憐客

情孤鶴迴詩思片雲傳何日休塵務相於結淨緣

許兵部表兄

宗彥

招同段明府

玉裁

凌教授

廷

堪項明經壩

李秀才

銳何主簿

元錫

戴刑部

敦

元

汪秀才

家禧

集比青軒

涼秋集羣彥高敞比青軒樹與堂俱美人如酒亦溫深  
談跋華燭雅意滿清尊名士江南北憑君屈指論

得家書

清曉家書到挑燈反復看彩牋才一幅愁緒忽千端苦  
愛湖山美渾忘鹽米難將雛差慰我少婦耐辛酸

靈隱紀遊四首

乾鵲噪簷角惠然來故人把手惜羈旅知我意未申  
扁舟呼一葉來橫湖之濱出城見西湖已展雙眉顰兩山  
雜紅黃霜葉色不純登舟復捨舟芭屨何佻佻薄棉覺  
妍暖節候報小春茲山才小別相隔未及旬譬若讀異  
書反復不厭頻僧寮可託足吾意無逡巡

吾愛飛來峯樹石窮殊相嶙峋起方寸夢寐不暫忘造  
物工力奇未易尺寸量咄嗟彼何人椎鑿徧青嶂名姝  
受鑽灸恨事不可償山靈悔飛來千載生惆悵安穩住  
天竺至今定無恙

清興殊未盡駕言上硯光茂竹夾幽徑老樹參天長高

下但一碧中露榭葉黃竹筧戛寒潤泠泠雜笙簧石磴  
正當塗小憩勞可忘縈紆陟小閣山仄易夕陽茶罷忽  
出門欲上千仞岡諸君且勿去伸腳眠匡牀

尋山中道罷如飢食不飽同遊告痛瘡撫髀獨騰蹕攝  
衣朽層厓力排羣論撓同行有杜郎

芳

亦愛窮幼眇置

身喬木顛聯步白雲表煙火十萬戶一望塵杳杳江湖  
信大物指點眼前小快哉今日遊解我腹中痺會當選  
良夜來看月出皎

送戴刑部入都

知名自垂髫三十年於今既覲君子面始知古人心蹤

跡共萍水言論合芥鍼客遊得良友快勝千黃金萬卷  
貯心胸不作書中蟬心如九秋月了無纖翳侵前生定  
老衲茅菴結欵峯偶然落塵網廿載參禪行藏學閒  
鷗隨波共浮沈泠泠太古意悄若風中琴在山忌出山  
軒冕非所歆長安居不易向平累尚深辭榮非此時歲  
月馳駸駸西湖佳山水知君豈滯淫去去莫回頭爲君  
畱清音期君十年後芭屨重相尋

送王上舍歸太倉

渺渺東路吾鄉有寓公才華江入海蹤跡雪留鴻一

卷元真子千秋蒲褐翁

君著錄王述菴侍郎門  
下侍郎自號蒲褐翁

論交非

草草惜別太恩。孤月滄江滿。寒林落葉空。微茫雲浦  
遠。迢遞尺書通。漫道干時易。何人挾策工。黃金催日短。  
白髮怕塗窮。文史三冬足。編摩畢世功。須努力行  
矣。莫慙慙。

歸里展墓感事書懷

三月西泠路。今朝返故鄉。悲深連理樹。慘絕逆毛鴒。識  
字憐兒穉。加餐祝母康。松楸對殘照。展拜淚泔泔。

經碧浪湖作

波定西子湖。愛其滄而靚。句留翫歲月。忽忽忘鄉井。還  
家厭岑寂。懷舊心恻恻。入城住五日。如一彈指頃。歸帆

經碧浪一樞煙水永初陽麗霜林宿霧斂層嶺青山列  
修眉一一曉妝整湖心卓孤塔窈窕隨舴艋春鉏傷淺  
浦孤翹意閒靜對此歎飄蓬何時收泛梗溪山殊可憐  
去之誰管領寄語蓑笠翁爲予駐清景

發里門作

又復辭家去行裝不可留何人反招隱欲賦畔牢愁衰  
草斜陽外寒林古渡頭含悽倚篷背惜別有沙鷗

風雨發山居作

一樞風和雨蒼茫指武林青衫多別淚柔櫓有清音尺  
尺鄉園隔艱難骨肉深篷窗頻喚酒誰識此時心



予於孟冬十日歸里戴刑部期於次日北上比  
予來杭猶未成行又以詩贈之

已定成行矣勾畱復爲誰重來還對酒此別又添詩紅  
樹紛如醉青山澹可思十年君莫忘湖畔故人期

同人夜集秋鴻館卽席各賦四韻

寒星挂空林朔風振窗紙明鐙映廣筵別離從此始相  
思各天涯美人隔秋水隨時崇令德後會豈云已

集秋鴻館酒後重送戴刑部

更欲畱君住君真不可畱從教歸緩緩奈此去悠悠燈  
火三更盡風霜兩地愁何殊在巴峽猿叫萬山秋

又送戴刑部

良朋天上月一見一回新到服少同調  
愜心真可人行  
行愁雪霰望望隔關津惆悵天涯遠誰云若比鄰

寄友

別後相思剗可憐天邊霜月向人圓  
知君清坐三更後  
憶我新詩又幾篇

與戴刑部宿秋鴻館

客裏清尊次第開銷魂賦罷重徘徊  
淒風寒雨秋鴻館  
又遣聯牀一昔來

椽燭燒殘就枕遲中宵不覺粟生肌  
人間何事千卿甚

話到鐘鳴漏斷時

次日李山人堂來集

故人侵曉至剝啄夢魂驚聚散兩無定往還殊有情停  
雲它日意落葉此身輕不盡今宵話踟躕又幾更

是夕仍畱宿秋鴻館

寒透重簾午夜風嚴城未罷鼓三通街頭霜滑君休去  
更盡離情此夕中

勸畱鬚行戲爲戴荆部作

人生不可無鬚眉之生與人生俱云何鬚出獨不竝  
造物吝惜情非無世人誰不愛年少愛它自愛心豈殊

王喬美好同所願  
彙彙共祝遲斯須  
咄哉此意吾不慚  
妍皮脆骨疑非夫  
當年我亦誇俊朗  
成童以往驚清臞  
生年三九養萌苗  
偶然撫鏡生歡娛  
五年以長戴員外  
萍蓬乃在明聖湖  
甘心直欲稱弟子  
頰首自茲安小巫  
何來一事欠斟酌  
敢以未喙參良謨  
崢嶸面目有遺憾  
公之領下良可吁  
臨風空有意飛動  
吟詩奚解心煩紆  
生意況復久如戟  
助公儀觀麗且都  
紛紛刀下不自惜  
何以點綴昂藏軀  
知交才俊徧海內  
豈無直諒徒阿諛  
大義不容效默默  
小忠敢忘陳區區  
先生不謗但一笑  
搖頭雙眼空睚眦  
下階再拜再三瀆  
芻蕘可擇公勿迂

以規爲瑣非所望請以故訓徵漢儒昔者倉頡製而字  
頰毛取象垂形模南閣祭酒書具在卓哉此義不可誣  
殺雞醜酒集同輩誰其異論非吾徒有言如此不見聽  
更不緘口何爲乎先生大笑子休矣我姑歸去徐爲圖

送丁明經歸嘉興

此地同棲泊君歸我未歸寒煙迷遠櫂涼月上征衣別  
館壺觴罷高齋笑語非鴛湖東去水生怕鯉書稀

又送戴刑部

寒水連天霜滿路掉頭欲去不甯住別館招要會文酒  
回頭欲住不甯去去住何由逐兩端留送翻教成兩誤

何不遲遲待好春  
吾曹長與伴晨昏  
不然便挂片帆去  
莫更臨歧說斷魂  
人生行樂須及早  
富貴神仙俱草草  
故鄉如此好湖山  
奈何蹙蹙長安道  
畢竟先生住亦難  
相逢容易說休官  
梅花一樹衝寒放  
江上依依送去鞍

與倪三

稻孫

泥飲紀事

狂伴相逢一放歌  
堂堂歲月易消磨  
夕陽樓上判沈醉  
大好湖山負它

新來醮賴竟何因  
我是深閨夢裏身  
拋卻西湖待歸去  
奈它漚鷺苦畱人

入城燈火已昏黃  
消受松風七盃香  
腸斷鱸邊人似月

才人一例太郎當

珠玉才華絕代無可憐蹤跡溷屠沽半生不盡蕭騷意  
都入寒宵試茗圖

米樓欲畫此圖以志游跡

同丁明經戴刑部遊南屏

我愛佳山水復愛良友朋兩美若熊魚得兼我未曾北  
風吹西湖湖水欲作冰湖邊畫舫閒此際與可棄水淺  
枯葑滿蘭柵進未能南屏路非遠斜日須長繩穢壁  
山橋豈惜窘步仍長隄人跡絕髡柳空髡鬢白鷺忽飛  
來忘機無繳矧撫景發長歎懷古意不勝衰草埋碧血  
九曜峯峻嶒再拜谷無言人事風中燈羈愁何以紓

若尋顛僧木榻覓句臥竹閣看山凭相呼買醉去  
隨邊酒如澠爛漫倒深杯愁絕吳姬憎青山瞑欲睡皓月東  
隅升道人亦多情送送緣荒塍城闔杳何許修路疲行  
縻入城各分手滿地霜華凝歸來掩僧寮勝游誰與矜  
重煩管城子紆蚓書谿藤

雪夜與倪三試茗

風雪乍飄蕭巖城轉寂寥茶宜深夜鬪愁傷美人消短  
鬢新霜滿修門舊夢遙祗應憑粉墨鴻爪記寒宵

寓樓曉起看積雪作

漏盡北風歇枕畔霜鐘清高樓侵曉起羣山隔林明萬



五無炊煙魚鱗皓已平節序感歲晏別離悔勞生窈窕  
故鄉山屋角眉黛橫空階積縞素松竹相淙琤一枝臨  
水梅春意澹未盈煙霞久託契猿鶴尋舊盟羈栖非吾  
願浩然歸柴荆

寓樓書懷

齊門鼓瑟笑迂疏小別鄉園半載餘學道無方能辟穀  
謀生何計且傭書窮愁天與湖山便感槩人非草木如  
莫上層樓賒望眼依依霜月出林初

仲冬晦前一夕同戴大倪三試茗

魚眼初生蟹眼過松風吹醒醉顏酡甌邊人與天邊月

一樣今宵別恨多

次夕復同試茗

分明高髻傷紅窗乍覺愁心隔座降卻話昨宵成一笑  
燈花看到影幢幢

衣裳頻爲夜寒添酒斟來意卻嫌還是催歸還惜別  
最愁人是雨廉纖

重送王上舍

風雪竟如此黯然開暮帆江天有歸雁幾日待書緘

同何三倪三湖樓小飲

雲繁風緊暮寒增隔水簾櫳漸上燈相對青山如夢裏

酒家樓上倍銷凝

西南一角晚霞微  
買醉還同帶醉歸  
莫向中年數哀樂  
幾人清淚不霑衣

何三招同戴大李大倪三夜集夢華館有懷王

上舍

又共壺觴一度新  
蕭蕭清影暫相親  
婁江今夜如詹月  
獨照秋鴻館  
寓人丹生自號

興福寺寓樓聯句

高樓啟虛牖

元照

戀戀夕陽入殿有鐘魚喧

倪稻孫

庭無巾

屐集故人如春風

元照

臘至吹將及拂面消薄寒

羅融

寒

散餘溼清言意所忻

元照

香林影先戢因來共懷古

孫遺

聞猶可輯梁雷延祐題

元照

大殿梁有元延祐甲寅題字

碑以在城立

有臨安在城興

悠然湖上山

孫相

對如拱揖碧雲離思

盡元照

歸鳥暮情急遲我天際鴻

孫相

望到臺茲

元照

未至

### 與戴大試茗

地僻堪容剡更長且鬪茶攜來天上月品到路傍花冰  
雪評懷抱雲龍翫歲華宦情元澹泊重向此中賒

戴大北上之期久而未定歲聿云暮擬束裝歸

家賦此爲別

日日問君行朝朝見君面君行何遲遲我意猶戀戀同  
雲垂四野嚴寒集雪霰空林多朔風歸巢鳥飛倦游子  
悲故鄉勞人感歲晏整駕返柴荆良會渺文讌江空煙  
水靜思君清淚濺

寓館老梅作花韻之悵然

野梅在禪房枝幹瘦如此高情殿冰雪得意先桃李微  
暄轉春信疏枝初放藥玉色醒倦眼冷豔照窗几依依  
向黃昏客情喚愁起獨坐延素輝當窗調綠綺時嶠不  
能寐睠言懷彼美

獨夜試茗作

狂蹤不避俗人猜  
暫遣情懷客裏開  
錯認文園病消渴  
品茶長待夜深來

匝地寒雲夜色淒  
傷心狂伴各東西  
此閒大有憐才者  
苦索屏風錦字題

題寒宵試茗圖

品茶端可慰飄零  
僻巷深宵已慣經  
幾處生涯非潦倒  
相看兒女總英靈  
春燈豔豔花能語  
暮雨瀟瀟曲重聽  
誰識廬山真面目  
浪傳狂態付丹青

謁梁學士丈飯於頻羅館賦呈

一飯常選客矜嚴  
疑絕俗

隨園老人贈先生詩有  
一飯矜嚴常選客之句

豈繫

重鮭菜聊用戒徵逐適逢意所欣盍嘗廢款曲昨朝破  
高齋春風風人足坐忘日亭午飢腸轉雷轂止客勿歸  
遽治具餉精藥問盃羹有魚大盆脯是鹿果然一笑粲  
將軍不負腹賤子備書來禪房半年宿朝朝黃壘根頓  
頓鯧鱖鱸攢肴對七箸望絕筍燒肉故人偶折簡華筵  
慰所欲杯盤羅几案茗芋勸醪淥窮薄眞生成又復厭  
繁縟平生賢主人非公更誰屬歸來思嘉肴饒涎笑相  
續賦詩非報惠後約來不速

水星閣探梅

高城繚平蕪傑閣立千仞官梅闕精藍凍雪阻芳訊先

春得小雨忽覺土膏潤綠梢生意動緋素一朝豐嬋人  
無嬌態生香更生韻娟娟傷疏簾叢竹巧相近步履行  
廣庭於焉釋幽愠南湖一泓水遺事誰與問風月無古  
今繁華感灰燼愛花惜花開開落愁轉瞬東風且弗吹  
遲遲待春信

冒雪水星閣探梅

窈窕南湖路梅花帶雪深重來如有約臨別一相尋黯  
黯添鄉思依依感客心懷人思折贈祇恐不勝簪

臘月十九日祭蘇公祠聯句

衝雪拜坡祠

德清許宗彥

故事歲一集

開化戴敦元

勝侶與會暫



元照

子與金谿皆偶爾相值也

國士配饗及

宗彥

別室供奉淮海栗主亦於是日致祭

虛榭寒轉深

敦元

疏梅香暗裏

元照

詩境在空林

宗彥

可見不

可拾款

元

二十日立春與戴刑部同離會城舟中作

雪霽知春到湖邊結伴歸數峯青鬢出一櫂淥波微判  
袂迎殘臘輕裘去遠圻篷窗今夕話燈火暫因依

過塘栖別刑部口占

津鼓宵分急

尊前空有淚燈畔又成詩水

驛停橈日河橋聽雨時玲瓏休遣唱都是別君詞

梅花七絕句

老幹橫斜欲出牆枝頭萬玉夜生光何人鼻觀先參取  
此是人間最勝香

籬外一枝斜最好孤山千樹太繁華我家幽竹山窗下  
辛苦經營欠此花

裁雲鑲月奪天工一洗人閒粉黛空只管自開還自落  
了無恩怨到東風

儘有遊人次第來籬邊問訊幾枝開春風一例愛桃李  
未許此曹知愛梅

獨占幽芳歲晚時生來怕受豔陽欺連天風雨漫天雪  
不會開花便不奇

暗香一縷逗微香國

臭味稀我有新詩與花配

清寒入骨不能肥

冷豔生香破早春水邊沙際自橫陳迢迢驛路三千里  
多少相思寄故人

共六千三百四十四字

柯家山館遺詩卷二終